

dextre representee en trois sortes. Car ou elle est seule, estendue & dressée en haut, comme en vne mienne medalle d'Augustus l'Empereur, qui a l'inscriptiō, *Scarpus Imperator*: ou elle est double, comme voyez en ce portrait: ou elle est triple, comme en la medalle des Triumvirs, Cesar, Antonius, Lepidus, en laquelle la troisieme main se vient par dessus appliquer aux deux autres iointes ensemble, avec adionction d'un caducee, fasces Consulaires, vn globe terrestre, & vne coignée. Toutes lesquelles choses signifient l'Empire Romain, voire tout le globe de la terre habitable estre regi fidellement & avec vne grāde concorde & vnion, en toute paix, felicité, iustice, seuerité & obseruation de loix. Car les mains dextres iointes ensemble, signifient vnité & concorde fidelle, promesse & assuree: Le caducee signifie paix & felicité: Le globe, l'Empire & regiment de la terre: La coignée & hache, la iustice, seuerité & obseruation des loix: ce qui est aussi denoté par les fasces Consulaires. Voyla ce qu'ont voulu estre entendu par ceste medalle, nos beaux Triumvirs: adioustans que de là dependoit le salut du genre humain (car telle est l'inscriptiō qui se voit à l'entour de ceste belle deuise) *salus generis humani*: mot par trop superbe & plein de toute arrogance. Mais retournans à nostre main dextre, disons que sous diuerses figures elle denotoit diuerses choses: car sa figure raccourcie & creuse en forme d'un petit vaisseau, signifie auarice. Telle fut à Rome la statue de Philemon, compositeur de Comedies, tendant la main creuse, comme prest à recevoir argent. Au contraire la main à demi estendue & renuersee contre bas, estoit entre les gestes de ceux qui faisoient quelques vœux. La main auancee, haulsee & estendue, horsmis le pouce qui estoit vn bien peu flechi & plié, estoit le geste du pacificateur, tant à pied qu'estant à cheual, ainsi que nous voyons l'Empereur Auguste en aucunes siennes medalles. De ce est auteur Quintilian, où il parle des gestes diuers. On sçait assez que la main fermee & poing clos, denote chicheté & tenacité. Les deux dextres iointes ensemble (comme ici) signifient promesse, foy donnee & receüe, feauté, loyauté: quelquefois concorde, comme aux medalles Triumvirales: quelquefois amitié, beneuolēce & charité, comme en ma medalle d'argēt de Pupienus Maximus, qui a au reuers deux dextres iointes avec inscriptiō, *Caritas mutua Augustorum*, qui est à dire, L'amour & charité mutuelle des deux Augustes, à sçauoir, Balbinus & ledict Pupienus. Les deux mains iointes l'une contre l'autre, & droit eleuees en haut, sont propres & conuiennent à l'homme adorant ou priant. Au de-

f.j.

La main  
dextre.

Livre.